



Aggustip 26-ani 2014

UKA 2014/61

Inatsisartut suleriaasianni § 36 naapertorlugu apeqquteqaat aallaavigalugu oqallinnissamik siunnersuut:

Kalaallit Nunaanni siunissami inuussutissarsiornikkut suliassanut, ilaatigut aatsitassarsiornikkut suliassanut atortulersuutinillu pisariaqartunik pilersitsinissamut, Kalaallit Nunaannut aningaasaliisarfimmik aningaasaateqarfiliortoqarnissaa pillugu Naalakkersuisut danskit naalagaaffiannik kiisalu danskit soraarnerussutisiaqalernissamut aningaasaateqarfiinik isumaqatiginninniarnissaat naalakkersuinikkut atituumik isumaqatigiissutigineqarsinnaanersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Andreas Uldum, Demokraatit)

Tungavilersuut

Nunatta aatsitassarsiorfinngortinniarnarata imaaliallaannaq anguneqarsinnaannginnera maani Nunatsinni ajoraluartumik nassuerutigisariaqarparput, naak amerlaqisugut tamanna angorusussimagaluarlutigu. Ujaasinissamut soqutiginninneq annertuupilussuuvoq, suliniutinilli aallartisarnissaannut pisariaqartumik aningaasalersuinissaq ajornaatsuinnaarpasinnngilaq. Assersuutitut taaneqarsinnaasut ilagaat London Mining piaanissamut akuersissummik 2013-imi oktobarip qaammataani tunineqarmat, suliniulli siunnersuutip matuma allanneqarnerani suli aallartinneqarsimanani.

Aatsitassarsiornerulli iluani aningaasaliinerit kisiisa pisariaqartinneqanngillat. Inuiaqatigiit inuussutissarsiutinillu ingerlaqartartut isertitassanik nutaanik, suliffissanik nutaanik inuussutissarsiornikkullu atituumik ineriartortitsinissamut aningaasaliisoqarnissaanik pisariaqartitsippot. Aningaasaliinerit taama ittut tungaviatigut nunarsuarmit tamanersuusinnaagaluarput, soormimi aningaasat pisariaqartinneqartut Naalagaaffeqatigiit iluanni pissarsiariniarutsigit.

Nunarput Danmarkilu oqaluttuarisaanikkut kulturikkullu ukiuni hundredeni arlalinni attaveqarput, Demokraatillu tungaannit isumaqarpugut, Danmarkip Nunatsinnik nalinginnaasumik soqutigisaqarneranik atorluaanerunissarput isumatasaarnerussasoq – ingammik nunatta ineriartortinneqarnissaanut nunani tamalaani aningaasaliisartut aningaasaliinissaminut soqutigisaqarpallaannginnerat eqqarsaatigalugu.

Demokraatinit tigussaasumik takorluugarput tassaavoq, Kalaallit Nunaannut aningaasaliisarfimmik aningaasaateqarfiliortoqassasoq danskit naalagaaffiata danskillu soraarnerussutisiaqalernissamut aningaasaateqarfiinit aningaasalersugaasumik, aningaasaateqarfillu taanna Nunatsinni nutaaliernerup, silap pissusianut tunngasunut, nukissiornerup, aalisarnerup, nunalerinerup aatsitassarsiornikkullu ineriartortitsinermut tunngatillugu aningaasaliinernik annertusaassaaq.



Aningaasaateqarfillu taanna assersuutigalugu Danmarkimi silap pissusianut tunngatillugu aningaasaliisarfirmik aningaasaateqarfiup ilusiligaaneratut iluseqartillugu pilersinneqarsinnaavoq.

Kalaallit Nunaannut aningaasaliisarfirmik aningaasaateqarfirmik pilersitsinerup iluaqutissartarissavaa, Nunatsinnut Danmarkimullu iluaqutaassamat. Eqqaamassavarpummi, Nunatsinni namminiileriartuinnarnitsinni, danskit naalagaaffiata ataatsimoortumik tapiissutitigut aningaasanik sipaarutigisai ikiliartuinnassammata.

Kalaallit Nunaannut aningaasaliisarfirmik aningaasaateqarfiliornissamik eqqarsaat Demokraatit Danmarkimi partiimit suleqataanit De Radikalenit tapersersorneqarpoq, taakkulu ilisimaneqartutut danskit naalackersuisuisa ilagaat. Taamaammat isumassarsiap Danmarkimit tigulluarneqarnissaa ilimanarpoq, Inatsisartuniilli suleqatiginnikkusunnerput aammalu danskit tungaannit Nunatsinni aningaasaliisoqarnissaanik kissaateqarnitsinnik pimoorussilluta takutitsinissarput pisariaqassagunarpoq.

Taamaammat matumani apeqquteqaat aallaavigalugu oqallinnissamik siunnersuut maani inersuarmi tamanit tigulluarneqarnissaa kissaatiginarpoq. Aammattaaq neriuutigaara, isumassarsiarpasuarnik isummersuuterpassuarnillu saqqummiussisoqarumaartoq, Naalackersuisut Kalaallit Nunaannut aningaasaliisarfirmik aningaasaateqarfiliornissamut suleriaqqinnissaminni atorluarsinnaasaannik.